

INZILA YA LEZA YAKA

BAMBILWA BUZUBA OBUNO

 . . . aniini buyo mbuli mbo tu kotamika mitwe yesu.

Taata wesu Wakujulu, twa Ku lumba nkambo ka Jesu Kristo, zisyomezyo Zyakwe zilemu Nzya katupa. Twa Ku lumba ku zintu zyonse. Tuli kundi lya bulangizi bulemu omuno mu dolopo eli akati ka Banakristo aba babotu. Tu langila Nguwe kuba akati kesu kuti atondzye buzyu Bwakwe, kupa bantu lusyomo, kuba nanika kusyoma. Obo mbo bukanze bwesu bwakuba kookuno, Taata. Tu lizi kuti inga twa Ku syoma. Ta tuko pyompwa. Nkambo twa cilomba mu Zina Lyakwe. Ameni.

Inga mwa kkala.

Twali kkomene loko cifumo cino kuba a kalimbabula aka a nkamu eyi mbotu ya bakutausi omuno mu dolopo. Elyo aboobo tu . . . Ndi yeeya kuti i—i bakwesu bai teping'a ikuti na umwi inga waiyanda. Ciindi cili boobo ca luswaanano ndo twa twa jisi. Elyo lino, sunumasiku mbusiku bwesu bwabili, kuya buzwidilila mu nzila. Aboobo lino, tu syoma kuti Mwami uyo mulongezya cakwiindilila kapati.

Nda syoma Ndi langide ku mweenzuma wangu mubotu, Muka. Upshaw, uukkede awa, Mucizi Upshaw. I Mwami aka longezye. Nda muyeeya Mukwesu Willie Upshaw. Nda kajisi lugwalo kuzwa kuli nguwe buzuba bumwi a cifoto ca Mukwesu Willie, Mwiiminizi wa mung'anda yamilao. Aboobo, wa—wa kali mulema kwa myaka iili makumi aali cisambomwe acisambomwe.

Wakali mu muswaangano busiku bumwi, kabona cilegaano cakali kujatikizya nguwe, kaciabuya atala lya bbunga, a nsuuti yakwe, kakoteme. Wa kali mu wiluceya a zyakweenzya, mbuli nyoonse mbomwa kamuzi, nkabela Mwami Jesu waka muponya masiku nagaonya. Elyo wa kali jisi lusyomo kusikila na kafwa.

Tu limvwa kulemekwa, sunumasiku, kuli mukamufu wakwe kuti kakkedo awa. Wakali amyaka yongaye yakukomena cindi na kaindi kuyobona Mwami? Wakali amyaka yongaye? [Mucizi Upshaw wawviila—Mul.] Wakapona kuba myaka ili makumi ali lusele acisambomwe yakukomena. [Mucizi Upshaw walungulula kufwa kwakwe.] Kaunka ku Julu kuyooba a . . . Tuli lumbide ku bantu balemu, basilumamba batapi ba lusyomo.

Lino, sunumasiku, ngu, ta tuyandi ku mujata kwa ciindi cilamfu. Twa kamu jata kwa mamainiti ali kkumi kwiindilila ciindi mangolezya ainda, maminiti ali makumi obilo kusikila

teeni. Kanji tulazwa yakkwana naini theeti. Ndila sola kubamba boobo sunumasiku. Nda kali . . . Nda kacinca kuzwa ku milumbe yangu yabusinsimi Nje kali kukambauka mu zibeela zyandeene zya cisi, ku miswaangano yavangeli alubo. Elyo aa milumbe eyo yabusinsimi, inga twai zumanana buyo a kuzumanana. Alimwi lino kwiicesya, cibaanga nciyumu, alimwi kucinca i—i mulimo cakumaninina.

Elyo nke kaambo Ndi cita ceeći: nkaambo buzuba bumwi, nkeselemuka kuzwa ku Canada, atala buyo awa mu Montana, cifumo maningi cimwi, Mwami Jesu . . . Ndi lizi cilimvwisya bweenzu, pele Nda kali kweenzya mu mootokala, nkabela cintucimwi caka kwelelezya kupakamana kwangu. Nda kamvwa Jwi, cantangalala mbuli mbo mumvwa lyangu, kwaamba, “Zina lyako lilembedwe aa cilundu eco.” Elyo Nda kalanga, elyo cindi ni twa kaima, Billy a Ndime, Mwami Jesu wakati, “Bweeda lino, akuyo talika ncito yavangeli mbuli buyo mbo kali kucita.”

Nke nkaambo Nceli waano sunumasiku, nkaambo nku joka ncobeni kuyo kombela baciswa. Kuli kaano kalamfu kuli nkako, alimwi Ndili masimpe nywebo nobantu baku mateepu ano, abo baswiilila mateepu esu, balaazi makani aa kaano. Ndili waano kukombela baciswa alubo. Kuli zipego zinji zipati muli Leza. Leza inga wa belesya kufumbwa cimwi cazyo mbuli Mbwa yanda ikuti na twa Mu lekela buyo kucita boobo. Ngu Mwami Leza.

Elyo lino, Ndi sola ku ta . . . tantamuka kuno bikka maanza aa bantu ikuti na Nda konzya kutantamuka kuli nkuko, nkaambo, okuya, kuboneka mbuli (oko kuli kabotu), pele kuboneka mbuli umwi, inga waponesegwa, ba lati, “Ee, *Niini-anini* wakabikka maanza ali ndime.” Mwabona? Ndi—Ndi yanda kumubona kubikka buyo maanza ali Nguwe, aali Kristo.

Bukanze bwangu nkuti, toonse tu lizi ku Magwalo, kuti kuponesegwa kwa Buleza kwaka bambwa kale ku musyomi onse. Calo ncibeeda—calo ncibeeda ca kupenga kwa Jesu: “Wa kayaswa nkambo ka nsotoko zyesu, ku mibunda Yakwe twa kaponesegwa. Mbuli Musa mbwa kasumpula nzoka ya mukuba mu nkanda, mbubonya Mwana wa muntu weelede kusumpulwa.” Kaambo nkakonya.

Alimwi eco cakali cikozyanyo, Kristo ncintu cini. Elyo mpawo ikuti—ikuti na mulungo wakaindi wakonzya kuleta kuponesegwa, nkunji buti kuli umwi mupya, oyo zijisi zintu zibotu, kuleta kuponesegwa kwa Buleza.

Lino, Jesu waka sumpulwa ku kaambo nkakonya eyo nzoka ya ncoya kacitwa (Wa kabambwa kuba cibi): nkaambo, nzoja akapangwa kuzwa ku mukuba, alimwi *mukuba* nci “tondezyo ca lubeta lwabuleza”; a *nzoka*, kutondezya “lutuko lwa nzoka” kuzwa ku muunda wa Edeni, oko cibi a kuciswa nkozya kanjilila.

Elyo Jesu takonzyi... Taakwe muntu ukonzya kukambauka Jesu Kristo mbuli mulungo kakutakwe kukambauka kuponesegwa kwa Buleza. Taakwe muntu uukonzya kukambauka Makani mabotu kakutakwe kukambauka kuponesegwa kwa Buleza. Nkaambo, mwabona, tamu...na ka...elede kuba a zintu zimwi. Mbuli kuti munyama wa kujata, taelede byo kumu kosola cituta cakwe, na kukosola kuboko kwakwe—kwakwe na kufumbwa eco nca kujisilidi. Komu jaya buyo kuzwa ku mutwe nkabela wacicita.

Elyo nje nzila Jesu mbwa kacita cindi Na—cindi Na kafwida cibi: Wa kajaya zintuzyonse ezyo cibi nca cakasola kucita, Wa ka tunununa cakumaninina. Tuli mukujana i—i mpindu kuzwa ku kupati kwesu...i mali acizibyo ca kuvunwa kwesu kukkwene ku kuboola Kwakwe alubo.

Aboobo, nywebo mwabona, malwazi cigaminina ala—alaletwa kuzwa ku cibi. Muntuumwi wakabisya. Kwakanyina malwazi kusikila ni kwakaba cibi. Elyo mpawo cindi cibi nica kanjila, malwazi aka citobela. Malwazi mbube bwa cibi. Elyo mpawo, cindi Na kajaya cibi, caka tola bube boonse a ncico. Mwabona, ca keelede kucita.

Lino, tula bala sunumasiku cibeela ca Lugwalo.

Ndili kkomene ncobeni kuba, kusule lyangu okuno sunumasiku, cikama cangu cibotu ca bakwesu bali ku muswaangano oyo cifumo cino, a kujana, kubona Mukwesu Shakarian kusule okuya, awalo, a beenzuma bangu banji, bunji babo. Botelwa kapati kuba a ndinywe bakwesu okuno sunumasiku. Amu ndikombele lino, ikuti na mula konzya.

Lino, atu jule mu Lugwalo, ku cibalo buyo ciniini, na Mwami wayanda.

² Elyo amuyeeye, juunza masiku, nkukombela balwazi alubo. Elyo lino cindi Nda kanana... Amuswiilile, bantubonse amusole kucita ceeci, muta lindili cintu cimwi kicitika. I cintu kuli ndinywe cakucita, nku syoma Leza ndyoonya lino. Amu Mu syome ndyoonya lino! Mwabona?

³ Lino kwakali misyobo yoonse ya milimo. Leza, mu mazuba aya akumamanino, Nda syoma, wa katupa zintuzyonse Nzya jisi mu Bbuku Lyakwe. Zintuzyonse ezyo Nzya kasyomezya, twa kabona, alimwi nekubaboobo kuboneka mbuli kuti bantu taba konzyi ku cimvwisywa. Abo baka salilwa ku cimvwisywa, bayo cimvwisywa; abo luzutu. Cila baofwaazyamwi; akujula meso ambi.

⁴ Amuyeeye, tula syoma kuti Jesu Kristo ngu mbobuca nguwenya, sunu, amuya myaaka. Ta fwide, pele uupona kwalyonse. Elyo Uli waano sunumasiku. Tuli mu Busyu Bwakwe, sunumasiku, alimwi Uli waano kusimpikizya a ku bamba kabotu cisyomezyo cili coonse eco Nca kabambilabu obuno. Elyo Ngu mbobuca nguwenya, sunu, amuya myaaka.

Aboobo, kufumbwa obo Mbwa kabede, Mbwa bede, sunumasiku. Aboobo atu Mu syome lino, mbuli mbo tubala Ijwi Lyakwe a kukanana Nguwe, kwa maminiti atobela ali kkumi aosanwe, makumi obilo.

⁵ Matalikilo, cipati ca 22, a kampango ka 7 a 8, ku nzila ya kujana cibalo.

Elyo Izaka wakaambila Abrahamu wisi, akuti, Ba taata: alimwi wa kati, Mpaawa Mpendi, mwana wangu. Elyo wa kati, Bona mulilo a nkuni: pele uli kuli i mwanaambelele i wa cituuzyo caku tenta?

Elyo Abrahamu wakati, mwana Angu, Leza ula libambilwa mwini mwanaambelele i wa cituuzyo caku tenta: aboobo ba keenda bobilo antoomwe.

⁶ Mwami Jesu, longezya Ijwi Lyako, akube kuti Lita joki cabuyo, pele akube kuti imbuto ziwide aabulongo ziyo leta lufutuko kuli baabo bali mu kubula, cakunyama a kumuuya. Twa lipa kuli Nduwe; mbunga, bbunga, Ijwi, cibalo, ciyo. Akube kuti Muuya Uusalala ubweze bulenge bwesu, cakuti tubone Jesu Kristo. Ameni.

⁷ Ndi yanda ku kaana maniniti masyoonto buyo accilila akuti: *Inzila Ya Leza Yaka Bambilwa Buzuba Obuno.*

⁸ Leza lyoonse wakali jisi nzila. Kuli nzila zyobilo, ezyo, inzila zyesu na nzila Zyakwe. Leza uli jisi nzila yasunu, nkambo lyoonse Wa kabamba nzila ya zintuzyonse. Leza, ku matalikilo, wakalaazi mamanino, aboobo Wa kabikka Lugwalo Lwakwe lwa bukkalo abumwi. Elyo bukkalo obo, cindi bwaboola ambele... Lino muta kakilwi kubona ceeci. Obo bukkalo, cindi caboola ambele, kanji mulimo zibingana loko mu tukamu twazilengwa zita tonkomene, a zimwi zimbi, a tunsiyansiya, mane mamaile aali milioni kuzwa ku Ijwi.

⁹ Elyo mpawo Leza lyoonse ulatuma muntu umwi aa cilao, musinsimi. Elyo oyu musinsimi... Leza tacinci ciyanza Cakwe. Ta cinci nzila Zyakwe. Ula cicita lyoonse munzila njiyonya. Mbwa kacita lyoonse; We elede kucicita ciindi eci. Elyo, kwiinda muli ceeci, Leza ulabeleka a kusimpikizya Ijwi eelyo. Mbuli Mbwe kakanana kuli ndinywe masiku ainda, Leza kapa bupanduluzi Bwakwe mwini. Leza tayandi umwi kupandulula Ijwi kuli Nguwe. Ula Li pandulula Mwini, kwiinda ku Li simpikizya, ku Li bamba kuba kasimpe. Elyo cindi Leza aamba kuti Uyo cita cintu cimwi, mpawo Ula cicita, takucikwe mubuzyo kuli ncico. Eyo nje nzila Mbwa cicita.

¹⁰ Aboobo Leza waka tubambilwa nzila. Leza ula bayanda bana Bakwe. Ula bayanda bantu Bakwe. Walo uyanda kubagwasya. Walo uyanda ku mugwasya maningi kwiinda mbo muyanda lugwasyo. Ikuti na mwakonzya buyo kunjizya eco mu myoyo yanu, kuti Leza uli libambilide loko ku mugwasya kwiinda mbobede kuli gwasya lwanu. Pele Uli jisi nzila, alimwi eyo nje

nzila ilikke Njayo beleka nkwiinda mu nzila Yakwe. Mweelede kuzika ku mabambe Akwe, kutali mabambe anu. Mabambe Akwe! Na muciyanda mu nzila imwi pele Ula—Ula cipa kuli ndinywe mu nzila Yakwe.

¹¹ Mboli Namaani kalinika mu i—i—i meenda a Jordano. Baa, wa kati meenda mu cisi cakwe ala salala loko a kabotu loko, pele tacili ceeeo musinsimi nca kaamba. “Kolinika awa.” Wa kalinika lomwe, cinsenda caka ciliko; ziindi zili cisambomwe, caka ciliko. Wa kacita kuswililila a kuboola nzila ya Leza. Elyo cindi Na kaswiililila nzila ya Leza cakumaninina, cinsenda cakazwa.

¹² Elyo Nda amba, sunumasiku, kuti na twai swiilila nzila yakabambwa aa Leza, cinsenda ciyoozwa, malwazi ayozwa, zintuzyonse ziyozwa, pele twe elede kuboola mu nzila Yakwe ya buzuba obuno. Lino, kulinika mu Jordano inga tii kwagwasya lino; oko kwakali kwa Namaani. I mulao wakali wa—wa ba Juda. Luzyalo nkwiinda kuli Kristo.

¹³ Pele bukkalo abumwi buli jisi cibela cabu ca Makanimabotu cakaambwa kale kumbele. Eli Bbaibbele nciyubunuzyo cimaninide ca Jesu Kristo. Taakwe cimbi cikonzya kuyungizigwa kuli Ndilyo, na cili conse cinga cagusigwa kuli Ndilyo; muntuu ucicita ula tukwa. Ta tukonzyi kuyungizya cintu kuli Ndilyo, kugusya cintu kuzwa kuli Ndilyo. Twe elede kulanga mukati Awa a kubona eco caka syomezegwa ku bukkalo obu, elyo mpawo ku cibona kacicitika. Oyo ngu Leza kapandulula Ijwi Lyakwe Mwini. Cindi ni Lya kati, “I musimbi uyo mita,” waa kacita. Obo mbo bupanduluzi bwa Leza kuli Ndilyo. Eco Nca syomezya, nce ncico Nca cita.

¹⁴ Lino tula bona kuti Leza tacinci ziyanza Zyakwe zya kucita zintu. Ula zicita lyoonse mbubonya. Tula zumanana kucincea nkaambo tula gola. Tula lubizya misyobo yonse, alimwi inga twa zwidilila akuba kabotu maningi. Pele Leza mupatikampatila. Muzeego wakwe mutaanzi uli londokede ciindi coonse. Ta konzyi kwiindila kuba musongo. Wa kali i . . . Walo nkasena ka busongo boonse. Walo mbusongo boonse. Ngu singuzu zyoonse, uujsi nguzuzyoonse, ulikokoонse, uuzyzionse, a mupatikampatila. Aboobo mpawo, cindi Walo aamba cili coonse, anzika buntu bwako ali Ncico, nkaambo nca kasimpe.

¹⁵ Lino mambungano amwi alati, “Elyo ta tusyomi *Eci*, alimwi tula syoma *eco*.” Leza taka beteki i—i inyika kwiinda ku mbungano. Ula ibetesya kwiinda kuli Jesu Kristo, alimwi Jesu ndi Ijwi. Uyo beteka mbungano kwiinda ku Ijwi.

¹⁶ Elyo ikuti na *Eci* nciyubunuzyo ca Jesu Kristo ca makkalo oonse, a ku bukkalo obu, Wa yubununwa mu Bbaibbele eli eco Nca yoocita mu bukkalo obu; elyo cindi twa Ci bona kacicicite, cindi twa Mu bona kacita eco Nca kasyomezya kucita. Kutali kuzyalwa kwa nakalindu; eyo yakali myaka ili zyuulu zyobilo

zyakainda. Pele eco Nca kasyomezya kucita sunu, eco Nca kaamba kuti Uyo cita sunu, obo mbombubo Mbwa bede sunu.

¹⁷ Ziindi zinji, bantu balati, “Ee, Nse syomi Ceeco.” Ee, muli jisi sikupandulula wa Eva alubo; citola buyo cibeela ca Ndilyo, pele kutali lyoonse lya Ndilyo.

¹⁸ Aboobo tu yanda kuyeeya kuti Leza ucili mbubonya lyoonse. Ijwi Lyakwe, alimwi eco Nca amba, Uyo cicita.

¹⁹ Tondezya kuti Ta cinci. Mu Matalikilo 1, Wa kati, “Imbuto zyoonse zizyale musyobo wazyo. Imbuto zyoonse zizyale musyobo wazyo.” Elyo mpoonya alya, tu njila cintucimwi cigosya basilwiiyo bonse basyoma mukukomena kwa zintu kucebuce. To konzyi kutintanya zintu alimwi. Inga wabeza mbili mbizi a—a i... a i—i kadonki, kuzi tintanya antomwe, uyo jana kambongolo, pele kambongolo taka konzyi kuli zyalulula kuleta kambongolo kambi. Kala ima mpoonya awo. “Aimwi mbuto izyale musyobo wayo.” Zila konzya kutintana, pele ila licinca ini kujoela, kutondezya kuti tazi komeni kucinca bucebuce mbuli obo. Peepe, munene. Ila ima mpoonya awo. Inga watintanya sipinaci a cintucimwi cimbi, antoomwe, akuleta kale, pele to konzyi kwitantanya eyo kujokela. Peepe, munene. Inga watintanya mapopwe akatintanisigwa; pele koasyanga ayo mapopwe akatintanisigwa lwabili, taakwe nco jana. We elede kwatintanya ciindi coonse. Nkaambo, Leza wakati, “Aimwi mbuto azyale musyobo wayo.”

²⁰ Elyo lino, ku kutintanya zintu, amulenge eco inyika moya njila. Nda kali kubala caano awa, kuzwa mu *Reader's Digest*, oko, “Myaka ili makumi obile kuzwa lino, banakazi taba kabi a bavwanda, ikuti na cazumanana. Balya zyakulya zyaka tintanisigwa.” I cintu ca ncico ngu, ba kazitintanya, alimwi eyo taili nzila muntunsi mbwa kapangwa, kulya musyobo oyo wa zyakulya. Ca kabambwa kuciswaana mu...na ku cilya mu nzila mbo caka lengwa. Nke kaambo, sunu, taba konzyi kubamba nyama a zintuzyonse nzila mbo zibede, nkaambo zya katintanisigwa, zyaka kasyangilwa mu kasaala, oh, musyobo onse wa nzila. Wa kanyongana koonse. Caka sika oko mukowa onse wabantu ku nyonganisigwa ku kuzwidilila kwabo, kusola kutola cintucimwi Leza kabamba kabotu, aku cisandula kucibamba nzila imbi, mu nzila yabo beni. Ko cisiya nzila Leza mbwa kacibamba!

²¹ Ca boola akwalo kuba mu busena oko nko bali mukusola kutintanya mambungano, sunu; kuzwa ku lubapatizyo lwini lwa Muuya Uusalala, kusika ku kusukana maanza; musyobo umwi wa kusansaila, kuya ku lubbizyo lwa maanzi. Oh, ma! I cintu coonse cakatintanisigwa. Tu yanda kujokela.

²² Ii cisyango cakatintanisigwa, weeledge kucibebeka a kufwafwaza, akutantamuna buuka mabbitolosi kuzwa kuli ncico. Pele kutali cisyango cini canseba mbotu; calo ciyumu,

canseba mbotu, taakwe buuka busika ali ncico. Cili jisi kunji muli ncico cakutapula kauka.

²³ Elyo mbubonya Munakristo wini! To elede ku mubebebeka aku muumauba, aku mwaambila *eci*, *eco*, na i *cimbi*. Uli jisi cintucimwi muli nguwe, lubbizyo lwa Muuya Uusalala, eco cigusya zyoonse zimbi kuzwa kuli ncico. To elede kucikombelela konse, nkaambo cisyangi cini ca Leza. Walo ujisi cintucimwi muli nguwe cilwana. I Munakristo ula lwana ku kabbeela konse ka busena mpa imvwi. Ce elede kucita ceeco, ikuti na cisola kulangila kuba. Elyo, kwiinda ku kucicita, kuli Cintucimwi muli nguwe eco cicibamba.

²⁴ Eva wakasola kutintanya Ijwi, ku matalikilo. Leza waka mwaambila, “I buzuba mbo muyoolya kuli nguwo, obo buzuba muyo fwa.” Waa kasola ku Li tintanya mukati ka luzibo olo Saatani ndwa kamupa. Elyo cindi na kacita, waa ka sweekelwa mukowa oonse wabantu, mpoonya awo, kuli dyabulosi, cindi na kasola kusanganya Ijwi lya Leza lisalala a luzibo.

²⁵ Ta cizwi ku luzibo lwa Ijwi, cila boola kwiinda ku nguzu zya Muuya Uusalala! “Kutali ku nguzu, ku bukozu, pele ku Muuya Wangu,” mbwaamba Mwami. Eyo nje nzila Leza mbwa cicita. Ijwi lya Leza ni Mbuto ya Buumi Butamani.

²⁶ Ikuti na wasola Ku Li tintanya, ino uyo citaanzi? Uyo lijaya omwini kubelesya Ndilyo. Tali kabeleki. Tali kasangani buya mbuli mafuta na maanzi mbo zitakonzyi kusola kusangana. Tali kaciciti.

²⁷ Ta zina, mu nzila zyoonse, kasola kuja cili conse cibotu kwinda nzila ya Leza ya kucicita. Nywebo mulizi, taakwe noba kajana nzila, mbotu, ya nkuku kuti izyalwe mu nyika eyi, kunze kuligomweda kuzwa mu cipapa cakwe. Sena mwakalizi eco? Taakwe noba kajana nzila mbotu maningi. I cintu ciniini cakazyalwa a mpemo niini ku mamanino a mulomo—ku mamanino a mulomo wakwe. Alimwi oyo mulomo muniini ngwa jiwi, ula beleka ku kwalaula konse akoonse, kusikila watalisya mutwe wakwe, wayunya mutwe wakwe anze, uli bwezela nzila yakwe cakwanguluka. Ni nzila yakabambwa aa Leza. Wa musomona kuzwa mu cipapa, iyo mujaya. Ta kaponi ikuti na wamusomona kuzwa mu cipapa. We elede kuboola nzila ya Leza.

²⁸ Eelyo nde penzi a Banakristo sunu. Twa kababombeka loko mbuli insipa, nkabela twa kasukana maanza abo akubaleta mukati ku kaziye, akuba sanganya mu mbungano. Cintu ncotu andikana ncipailo ca mipailo yaciyanza cakaindi oko nkoba paila kuzwidilila, mane kulibelesya beni, kaboola mu nzila yakabambwa aa Leza, kusikila baka lyaangulula kuzwa ku nyika. I penzi lya ncico, sunu, babikka mazina abo mu bbuku a kusangana mbungano, nkabela nku koonse kuliko kuli ncico. Pele nzila ya Leza, nzila yakabambwa, nku kkala okuya a

kubeleka muciindi cako, kusikila Leza wakupa Kuzyalwa kupya. Mbo mbubo ncobeni. Ku mubweza, kuyo mujaya.

²⁹ Eelyo nde penzi, asunu, ku bantu. Ii Kuzyalwa kupaya, boonse bala kuleya. Taba kuyandi. Oh, ba sintanya cintucimwi ku Kuzyalwa kupya, “kuuboola a kusyoma, nkabela nku koonsen koelede kucita.” I dyabulosi ula syoma, mwini, alimwi mulizi kuti taka zyalululwa. Kuli Kuzyalwa kupya. Kuli cintucimwi ciinka ankuko, kubaanga takweeleli, taku botezyi ku inyika.

³⁰ Kufumbwa kuzyalwa nkwa busofwi. Ta ndikwe makani nko kucitikila. Ikuti na kuli mu caanda ca ngulube, na—na cibbadela. Ii kuzyalwa nkwa busofwi.

³¹ Mburonya a Kuzyalwa kupya! Kuyo kubamba kucita zintu nzota kayeeya kuti inga wacita. Kuyo kubamba kufugama ku cipaililo a kulila, kukwiila, kosanza penti kuzwa ku busu bwako, kunyamuna maanza ako, kulumbaizya Leza, kanana mu myaambo, a misyobo yoonse ya zintu. I Kuzyalwa kupya kuyo cita ceeco nkaambo ni nzila yakabambwa aa Leza ya kuzyalululwa.

³² We elede kufwa. We elede kufwa kotana konzya kuzyalululwa. Kufumbwa mbuto yeelede kufwa kaitana lengululwa. Ya tafwa, ila kkalilila ilikke. Ii muntu weelede kufwa ku kuyeeya kwakwe mwini. We elede kufwa ku kuyeeya cintu cili coonse cita Ijwi lya Leza, a kuboola mu nzila Yakwe. Eyo ni mbaakanji ya Leza. Ta tu Mu swaani aa miyeeyo yesu; tula Mu swaana ali ceeco Nca kaamba kucita. Eyo ni nzila yakabambwa aa Leza kuli ncico. Banti bala kuleya; taba kuyandi. Pele nkwa kasimpe, mbubonya buyo. Kuya, kuleta lufu, alimwi welede kufwa, kufwa ku kuyeeya kwako.

³³ “Ee, Ndi lizi kuti Bbaibbele lila kwaamba, pele Nse konzyi ku kumvwisya.” Mpawo amukkale awo mane Leza akuyubunune. Mbo mbubo. Ku jisi...Oko Nkuzyalwa kupya.

³⁴ Madasiki a magiizi, taana kujana nzla imbi mbotu kuli ngawo kuya ku Musanza, kunze lya kweenda mu nkamu. Elyo mbo mbubo. Muyo abona onse ka swaangana antoomwe nkabela ayo libunga eni, musyobo umwi wakulimvwa kwa bulenge kwaakelela antoomwe, nkabela ala bungana a leenda mu nkamu kaatana kuuluka, kaatana kuya ku Musanza. Ino ncinzi? Nciindi ca lubukulusyo, cindi caonse kuba antoomwe. Sena mwaka sola kumvwa kulila lila kui obo mu buumi bwanu, mbuli kumvwa ma giizi kaaba antoomwe, na madakisi? Nseni mvwide cili boobo! Elyo bali jisi...Taakwe imbi pe, nzila mbotu kuli ngawo ya kucicita.

³⁵ Ziindi zinji, kutala mu zisaka zya kunyika, Nda langilila matalikilo aa bube butontola, mu Canada. Cikama ca madakisi kaazyalwa nkoonya okuya mu ciziba eco, taakwe ciindi nakazwide mu ciziba eco, eci cintu ciniini tacina cita. Elyo cintu citaanzi mulizi, luwo lwampewo lula seluka kuzwa Kunyika.

Oyu muniini, mweenze wamadasiki muniini, wa kazyalwa kuba musololi, ulasika mpoonya alya akati ka cidambwa eco, ula lungumika cakulizya cakwe ciniini mu luwo, akulila ziindi zyone na zyosanwe, nkabela dakisi lyonse mu cidambwa lilasika kuli nguwe. Elyo ula buka kuzwa awo, a kuunka kugama buyo ku Louisiana mbuli mbwa konzya kwiinka, ku mpulasi zya raisi.

³⁶ Nkaambonzi? Taakwe noba kajana nzila mbotu maningi kuli nguwe kusika okuya. To konzya kwaembela antoomwe. Wa bikka mu kujika a...ii cizangala, akubeenza kuya kunseleo okuya. Eelyo dakisi lijisi kuyeeya kubotu kwiinda ceeco. Elyo wa mubikka mu cizangala eco, ku mutola kunselelo okuya, ulizi kuti uya ku cijailo. Mbo mbubo ncobeni. Ula unka mu nzila yakabambwa aa Leza.

³⁷ Eyo nje nzila muntu mbwaelede kucita asunu, kutala kweenzegwa mu cizangala cimwi cakabungwe. Pele kaboola mu nzila Leza mbwa kaamba ka njila, kwiinda ku lubapatizyo lwa Muuya Uusalala a Kuzyalwa kupya, lubukulusyo luzwide boyo bunji. Kutali mbungano kusangana, nkumbizyo loko kuzwa ku mulyango kuyaku mulyango, a kwiindilila ma magazini; pele Kuzyalwa, muku zyalwa lwabili, kuzuzigwa a Muuya Uusalala, nzila ya Leza, kalyangulula lwakwe kuzwa ku nyika. Mbubo! Kusyoma Ijwi lya Leza! I oora lili waano. Eco ncencico nec tweedelede kusyoma.

³⁸ Muntu, to konzyi... Nse jisi makani bantu mbobali banji basola kuya ku cidambwa eco camadakisi kutala okuya a kuti, "Lino amundile anii, nywebo madakisi maniini, jisi cintucimwi ca kwaambaula kuli ndinywe. Tu jisi dakisi lyakaiya awa. Li jisi Ph.D. a LL.D. Nda mwaambila, lila konzya ku musololela."

³⁹ Alo madakisi ajisi kuyeeya kubotu kwiinda ceeco. Iiyi, munene. Taakwe ndaba akujatikizya Iwiiyo lwakwe lubotu, kufumbwa mbo lubede. Ala konzya kuziba kulila kumwi nkwapa. Nkulimvwa kumwi kwabulenge. Oh, ma! I mbungano yeelede kuziba kapati makani aa Ijwi lya Leza!

⁴⁰ Nkulila cakutamvwisigwa. I Bbaibbele lyakati, Paulo wakati, "Ikuti na mweembo wapa kulila cakutamvwisigwa, nguni unga walibambilika ku nkondo?" Mbo mbubo, ikuti na mbungano—ikuti na mbungano yapa kulila cakutamvwisigwa kwa "kusangana."

⁴¹ Leza wakati, "Kuzyalwa!" Eco Kuzyalwa nkokwa kacita okuya, Kuzyalwa kula cita mbubony asunu, nkaambo Jesu Kristo ngu mbobuca nguwenya, sunu, amuya myaaka. Obo Mbwa kabede kaindi, Mbwa bede asunu. Eco ncoba kacita kaindi, ncintu nciconya nec tucita asunu. I nzila mboba Ki jana okuya, nce cintu nciconya ncoba cita asunu. Cintu nciconya ncoba jisi asunu, nceeco nciba kajisi kaindi okuya. Ikuti na

Kwa boola pee, Ku boola munzila eyo. Eyo nje nzila, nzila yakabambwa aa Leza. Tai cinci pe.

⁴² Madakisi tacinci pe. Aleenda mu nkamu cakumaninina, amwaka, kuya kunyika, ku musanza, akufumbwa nzila nkwa unka. Aenda mu nkamu lutaanzi.

⁴³ Eyo nje nzila Leza nja cita. Ula tuma Ijwi Lyakwe mu ciindi ceelede, eco cindiceelede, mpawo Lyakwe tondezegwa. Elyo Nse kwe ndaba na zintu zimbi zinji ziya buzumanana; cindi babona Ijwi lyakwe syomezegwa ku buzuba obo, muku simpikizigwa a kusyomezya, taakwe cintu ciyo balesya. "Ii nakalindu uyo mita." Elyo cindi niba kati . . .

⁴⁴ "I Mwami Leza wesi uyo busya Musinsimi uli mbuli ndime," Musa wa kaamba.

⁴⁵ Elyo cindi niba kabona oyu Muntu kaboola a kucita zintu Nzya kacita, ba kaziba kuti wakali Mesiya. Cindi Filipo nakabona eco kacicitwa, wa kati, "Nduwe Kristo. Yebo uli Mwaami wa Israyeli." Wa kali cizi nkaambo Ijwi lyakwe cisyomezya, alimwi lyakali kupona mu buzuba obo. Takukwe Bafarisi a Basaduki nabakali banji buti, baka imvwi abusena, Bamaiyi Balwiyo lwabukombi, tii caka kulesya nokuceya, nkaambo wa kali kuyandaula citondezyo eco. Cindi na kacibona kacicitwa, eco cakali citondezyo ca oora. Eco ncencico neco bakali kulangila, nzila yakabambwa aa Leza. Iiyi, munene.

⁴⁶ Lino inga toopa dakisi, Iwiiyo. Ta kakonzya kucicita. Inga na telya luyanda. Amwi madakisi inga ta mutobela, takutakwe kulanga kuvula kwa madigrii nga konzya kwaamba kuti wa kali jisi. "Lino, amulangisye awa, Nse kaunka ku cikolo ca madakisi. Ndi lizi coonse kujatikizya ncico. Nda sekelela kumanizya Iwiiyo lwaatala. Ndi lizi zintu ezi zyoonse." Ta cikagwasyi nokuceya. Taakwe limwi lya madakisi ambi linga lya mutobezya, ikuti na ali madakisi eni, ameni, nkaambo alangila citondezyo cimwi. Cindi abona citondezyo eco, ala cisyoma.

⁴⁷ Elyo ikuti na dakisi lili jisi nzila yaku ciziba, ino kujatikizya Munakristo wakazyalululwa? Twe elede kuziba Jesu Kristo mu nguzu zya bubuke Bwakwe. Mbubo. Leza ula cicita mu nzila yakabambwa aa Leza.

⁴⁸ Amuyeeeye, Iwiiyo nilwa takaba cibelesyo caku basololela ku busena bwaka pegwa aa Leza. I cibelesyo ncaa jisi nkulimvwaa kumwi bwabulenge. Elyo alo, madakisi ayo, alizi kuti kulimvwaa kwabulenge kuyo atola ku busena bwaka bambwa a Leza.

⁴⁹ Mburonya Muuya Uusalala uyo tola Mbungano ku busena bwaka bambwa a Leza. Kutali kusangana mbungano, pele ku zuzigwa a Busyu Bwakwe, kubona Ijwi Lyakwe kali tondezegwa, kusimpikizigwa. Eyo nje nzila yakabambwa aa Leza ku mbungano, lyoonse, ya bantu, ku baleta ku busena obo Leza mbwa kababambila. Obo mbombubo mbungano mbo yeelede kuba sunu. Lino, tu lizi kuti mbwini.

⁵⁰ Taakwe nzila mbotu mainigi ya... Tabana kujana nzila mbotu maningi ya muvwanda ku kujana eyo ncayanda kunze lya kucililila. Ikuti na wa mupa mulangu, a kwaamba, "Junior, uli buyo mazuba otatwe aakukomena, pele eno cindi wayanda ku, cindi wa yanda bbodela lyako, nyamuna mulangu oyu a kuulizya," kubona ikuti na cila beleki. Taci beleki. I muvwanda uyo lalila eco nca yanda. Eyo ni nzila yakabambwa aa Leza. Mbo indila koompolola... Uta munabbi muntu muniini, utobela buyo nzila yakabambwa a Leza. Walo uyanda cintucimwi. Mbo mbubo. Ni nzila ilikke njazi kwiita banyina; kukwiilila ncico, ku cililila. Mbo mbubo.

⁵¹ Leza ula kulwaizya eci ku bana Bakwe. Leza ula kulwaizya eci ku bana Bakwe basyoma. Wa kacita. Kutali bukanazi bwabupampu, kuta lwiiyo lupati lwabukombi, lwiiyo lwabukombi lwakuyisya. Walo uyanda kulilila kubula kwakwe. Elyo mbo mbubo, ko cililila! Uli muyumu a situlengwa loko, toka cijani. Ikuti na uli libambilide kuli nyanyamusya omwini aniihi, a kulila, Leza uyo cipa kuli nduwe. Ula botelwa kumvwa bana Bakwe kabalila. Kolilila kubula kwako kuli Leza! Leza ula cibotelwa. Eyo nje nzila Yakwe ipedwe. Ko coompolweda! Eyo nje nzila muvwanda jalila; eyo nje nzila Mbwa yanda kuti kolila.

"Kulila kulamfu buti?"

⁵² Ino muvwanda utola ciindi cilamfu buti? Kusikila wa kkutila. Elyo nje nzila Munakristo uusyoma mbwaelede kucita, mwana wa Leza. Ikuti na wabona kuti Leza wakapa cisyomezyo, uta leki pe, kolila mane kwavwiilwa. Kulila mane ukabone Leza wasimpikizya Ijwi Lyakwe. Cindi Leza asimpikizya Ijwi Lyakwe, akutondezya kuli cili awa, mpawo to ciyandikani kulila limbi; wa cijana, kozwa aku Mu lumba nkambo ka ncico. Kusikila wa cita ceeco, kokwiila mane uka cijane. Nda cibotelwa eco, kukakatila, kujatilila.

⁵³ Kutali cisyanggo caka tintanisigwa, kutali cimwi cakubebeka akubuwigwa buwigwa konse. Banakristo bakazyalwa ncobeni, kasimpe, zintu zini zya Leza. Bala bulwanina busena bwabo, kulwana mane bamaninina aa nyika eyi. Kweenda koonse kwa ncico nkulpwana.

⁵⁴ Leza wakaambila Musa kuti Uyo mupa nyika. Wa kaambila Joshua kuti, "Abusena bonse cituta, na tende lya cituda cako, mpo cilyata, Njo kupa mpawo." Ba kacita kulwanina kabeela konse ka njiyo. Mbubonya aswebo mbo tulwanina kabeela konse ka njiyo. Ta cili cintucimwi caku bebekwa a kubuwigwa buwigwa, a konse mbuli obo, a kuti, "Ee, Njo kutola okuya, kubona eco nco yeeya kujatikizya ncico. Koindilila kuyeyea kwako." Eyo taili nzila ya kuboola.

⁵⁵ Koboolla akukanza. Koboolla kuteeti uyo kkala alya mane camana. Amukkale okuya mane Leza akaingule a kusimpikizya.

Ii muntu oyo usyoma muli Leza, inga wabona Busyu bwa Leza, kumvwa Busyu bwa Leza, kutweluka Busyu bwa Leza, a kuziba kuti Mpali awa. Mpali awa ku kuvviila cintu conse eco Nca kasyomezya ku buzuba obuno. Mpawo, kolila mane ucijane! Kojatilila kuli Nguwe. Uta zwi, ikuti na weelede kukkala isikati a masiku. Leza tayandi bana Bakwe kuswiilila ku bukanazi wa bupampu. Walo uyanda kuti baompolweda Ndilyo, kusikila cisyomezyo casimpikizigwa.

⁵⁶ Abrahamu awa waka jisi kubula kwa cituuzyo. Ncinzi cakacitika? Leza waka mubambilila kabelele. Eyo yakali nzila yakabambwa aa Leza. Wa kali kuyanda cituuzyo, aboobo Leza waka cibamba. Kumane booboo, wa kaita busena kuti *Jehova-Jireh*, “i Mwami uyo libambilila cituuzyo Lwakwe.”

⁵⁷ Lino, Jobu, ciindi cimwi, musinsimi mudaala, Jobu. Wa kali musinsimi. Wa kanjide mu mapenzi. Saatani wakayandisya ku musunka, nkabela wa kafumukwa zyuute. Alimwi wa katolede bana bakwe, wa katolede zivubwa zyakwe, wa kali tolede zyoonse nzya kajisi, alimwi wa kafumukwa zyuute.

⁵⁸ Elyo basikumuumbulizya bakasika, ino bakacita nzi? Taakwe nco bakapa cita kusabula, kumufubaazya, ku mwaambila kuti, “Baa, wa kabisyia, kumbali.”

⁵⁹ Elyo Jobu waka jatilila buyo ncobeni. Wa koompolola. Wa kali masimpe kuti wakali kutobelila milao ya Leza. Wa kacita nciconya eco Leza nca kasyomezya kucita. Eco Leza nca kamusyomezya, kuti Uyo mwiiminina, kunsi lya cituuzyo caku tenta, elyo wa kakkala okuya.

⁶⁰ Aboobo, Leza waka mubambilila cilengaano. Wa kali musinsimi. Ino ncinzi nca kabona? Wa kabona Ijwi, Jesu Kristo. Wa kati, “Ndi lizi Munununi wangu ula pona. Elyo ku mazuba akumamanino, Uyo imikila atala lya nyika. Nekubakuti tuuka twa lukanda twanyonyoona oyu mubili, kwalu mu mubili wangu Njo mubona Leza.” Mwabona, Wa kapa cilengaano ca bubuke kuli nguwe. Walo mukuba musinsimi, wa kalibona Ijwi. Wa kabona Ijwi alimwi wa kalizi kuti mafuwa akwe a mubili wakwe ziyo buka alubo mu buzuba bwamamanino. Wa kabuzigwa ikuti na kalizi awo Leza mpa kabede, ikuti na kakonzya biyo kubona.

⁶¹ Wa kati, “I lubaluba lilafwa, lila buka alimwi; samu lilainka ansi, lila pasuka alubo; pele muntu alala akufwa, ula yabaala, ino uli kuli? O kuti Wa ndisia mu cuumbwe, a kundi bamba mu busena busisidwe mane bukali Bwako bukainde.”

⁶² Mpawo mizuzumo yaka talika kuzunzuma, lulabo Iwakatalika kumweka, Muuya wa Mwami waka boola aa musinsimi. Elyo wa kaima, a kubona Kuboola kwa Mwami, nkabela wa kakwiila, “Ndi lizyi Munununi wangu ula pona, alimwi ku mazuba akumamanino Uyo imikila aa nyika. Nekubakuti tuuka twa lukanda twa nyonyoona mubili oyu, mu mubili wangu Njo bona Leza.” Leza wakapa Ijwi, Jesu

Kristo, nkabela wa ka Mu bona a ku Mwi ita kuti Munununi wakwe.

⁶³ Israyeli yakali kuyandikana nzila kuzwa mu Egepita, nkabela Leza waka babambilide musinsimi, musinsimi oyo waka simpikizya Ijwi eelyo lyaka syomezegwa kuli Abrahamu. Mbombubo, nzila yakabambwa aa Leza! Tii bakalikukonzya kuyiisya bamasooja, tii bakali kukonzya kucita *ceeci*, tii bakali kukonzya kucita *ceeco*. I cintu buyo ncoba kacita cakali kulindila nzila yakabambwa aa Leza. Elyo Wa kaamba, kati, “Uyo gusya bantu abo, kwaakumana myaka ili myaanda yone. Bantu bakwe bayooba mu bwaange, pele Uyo bagwisya a janza lyanguzu. Uyo tondezya zitondezyo a zigambyo Zyakwe, a kujana bulemu mu cisi eco.”

⁶⁴ Mpaawa kwa kaboola muntu kunselelo, cindi niba kalila a kulila! Elyo lino amuyeeye, kulila koonse nikwataka bavuna, kusikila ciindi eco ni cakazulizigwa.

⁶⁵ Ezi zintu nzo tubona sunu, tii zyakakonzya kucitika myaka ili makumi obile yakainda, na myaka ili makumi one yakainda. Sunu zila citika. Eli nde oora! Eci nce ciindi! Lino nciindi cazulizigwa. Nkaambonzi? Leza waka cisymezya, elyo nceecwi we.

⁶⁶ Ba kati, myaka ili mwaanda yakainda, kuti, “I lubbizyo lwa Muuya Uusalala tiilwa kakonzya kuba alubo.” Ba kati, myaka ili makumi osanwe yakainda, “I Muuya Uusalala . . .” Pele nywebo nobantu ba Pentekoste mwaka batondezya, kuti lyakali oora lya Leza kutila Muuya Uusalala. Takukwe makani eco ba Methodisti, Baptisti, Presbyteria, Lutherani ncoba kaamba, mwaka kkala ncobeni a Ijwi lya Leza. Bantu ba camba bakaunka kumasena okuya a kujatilila mane lubapatizyo lwa Muuya Uusalala lwakasika, elyo ba kaamba mu myaambo a kulemeka Leza. Taakwe muntu ukonzya ku mwaambila cimbi cili conse. Leza ngu sikupandulula Lwakwe Mwini; mwa kacitambla. Kwayanda inga tee mwakonzya ku cipandulula, pele muli zyi kuti muli cijisi. Nguni ukonzya kupandulula Leza? Taakwe muntu uukonzya.

⁶⁷ Nse konzyi ku mwaambila obo Leza mbwa konzya kutondezya cilengaano, pele Ndi lizi cila citika. Nse konzyi kubona nzila Leza mbwa konzya kucita zintu ezi. Tauli mulimo wangu waku cipandulula. Ngu, kkalilila alikké. Ngu Elohimu, Umwi ulijisilidi mwini. Ndili mulanda Wakwe buyo. Ndi lizi Wa ka cisymezya, alimwi Ndi lizi cili waano. Eco cintu comwe Nce zyi. Ndi lizi kuti, kuti Ngu mbobuca nguwenya, sunu, amuya myaaka. Ndi lizi Wa kasyomezya *ceeci*, alimwi Leza uli waano kubamba cisymezyo Cakwe kuba bwini. Inzya. Nzila yakabambwa aa Leza!

⁶⁸ Israyeli yaka bambilwa musinsimi, oyo waka simpikizya Ijwi, nkabela baka gusigwa. Oyu musinsimi, Musa, wa kapona

kwa myaka misyoonto mu nkanda, myaka ili makumi one, kalwisyanya a bantu aba, kasola kubabamba mane na kakonzya kubasisya ku nyika yaka syomezegwa. Ca kaboola ku busena, muntu wakacita kufwa; wa kali myaka ili mwaanda a makumi obile yakukomena. Kwakanyina busena bwakwe bwa kufwida. Cindi na kalibambilila kufwa, Leza waka mubambilila Mwaala; Mwaala oyo ngwa kaumide mu nkanda, Mwaala oyo wakabatobela, oyo nko bakanywida. Leza waka mubambilila Mwaala, busena bwa kufwida, oko Musa nkakwali kukonzya kufwa lufu luli kabotu.

⁶⁹ Atala aa Mwaala oyu, Leza, andifwe aa Mwaala oyo nguwenya! Mpaawo Mpe yanda. Oyo Mwaala wakali Kristo Jesu. Iiyi, munene.

⁷⁰ Na kamana kufwida, aa Mwaala oyo, wa kali kuyandikana basikukutauka mutunta. Leza waka mutumina nkamu ya Baangelo. Nkaambonzi kutali nkamu ya baalu bakwe? Nkaambo taakwe muntu wakali kukonzya kumutola oko nkakwali kuya, pele Baangelo. Ba kamutola mu Busyu bwa Leza, wa kali kuyandikana basikukutauka mutunta nkabela Leza waka cibamba. Wa kaunka nzila yakabambwa aa Leza. Aleluya!

⁷¹ Enoki wakeenda kwa myaka ili myaanda yosanwe a Leza, nkabela wa ka Mu botela. Wa kali kuyandikana mugwagwamupati kuyabuya ku Muunzi. Leza waka ubamba.

⁷² Eliya wakali singanya Jezebele ku busyu bwakwe bupentedwe, a nzila yakwe njia kabamba bantu boonse kucita. Elyo wa kali katede a kudekela, alimwi wakali kutandila kulibambilila kuya ku Muunzi. Wa kali cembeede loko cakuti takali kukonzya kweenda kulanduka Jordano; Leza wakabambwa nzila kuli nguwe ya kuzabuka Jordano. Wa kali kuyanda kuunka ku Julu, kuyo swaana Leza; Leza wakatuma nkalaki ya mulilo ansi, a mbizi, a kumutola kujulu. Inzila yakabambwa a Leza. Inzila yakabambwa a Leza. Ula cita lyoonse mbubonya nconzyo. Yaa. Iiyi, munene. Leza ulabamba nzila, lyoonse. Iiyi.

⁷³ I bantu basongo, cindi nibakali mu lweendo lwabo kuzwa kutala mu Babuloni, bakali kubona nzila njo bakali kuyanda kuselemukila, nkaambo ba kalizi kuti Mwaami oyu wa keelede kuzyalwa. Ba kali kuyandikana kkampasi; Leza wakapa Nyenyezi. Ba kasiya zintu zyoonse zimbi kusule. Tii bakali kuyandikana makkampasi; ba katobela Nyenyezi. Yakali nzila yakabambwa aa Leza. Leza wakabambwa nzila, ba katobela Nyenyezi kusikila baka jana Mumuni uulondokede. Oh!

⁷⁴ I inyika yakali kuyandikana Mufutuli, buzuba bumwi. Ba kali sweekede; tiiba kacizyi. Ba kali kuyeyya kuyeyya kuti bakafutuka, pele bakali kuyandikana Mufutuli. Leza wakapa Mwana, kuba Mufutuli. Nkaambonzi? Taakwe muntu umbi wakali kukonzya kucicita. Kwakanyina muntu aa nyika, kwiina

muntu ku Julu, kulikoonse, wa kali kukonzya kucicita. Leza wakavunikila nakalindu, waa kamita a kuzyala Mwana-Muntu. Elyo oyo Mwana-Muntu takali mu Juda na Munamasi. Wa kali Leza, waka yubululwa mu mibili wabantu, Umwi alikke wakali kukonzya kunununa. Bulowa Bwakwe bula tufutula. Bulowa Bwakwe bula tuponya. Mpaa Bulowa mpo tukonzya kwiimina, ku cisyomezyo cili coonse eco Nca kapanga. Leza wakasyomezya kucicita.

⁷⁵ Leza uswaana biyo mukombi kwiinda mu Bulowa, a kunsi lya Bulowa. Israyeli yaka jisi busena bomwe bwa kuswaanganina Leza. Kutali mu ii... Leza uli jisi Busena bomwe, sunu, obo Mbwa—Mbwa swaanganina mukombi; kutali ku Methodisti, Baptisti, na Pentekoste. Ula baswaanganya kunsi lya Bulowa. Obo mbo busena bulikke bwakabambwa a Leza mbwa kacita; kutali mu kabunga, kutali mu lukamantano. Pele mu Bulowa mibusena awo Jesu Kristo mpa swaanina mukombi Wakwe. “Cindi Nda bona Bulowa!” Eyo ni nzila yakabambwa a Leza.

⁷⁶ Mbungano niya kamana kulamwa cakumaninina, cindi niba ka Mu bona, kuti Wa kali Mesiya!

⁷⁷ Cindi mwanakazi muniini ku mukalo, cindi nakali kuyandikana Mufutuli, waa kali kuyandikana cintucimwi ca kutondezya. Waa kali ku mbungano a zintuzyonse zimbi, alimwi bakabona kayanza kabukombi aka a kayanza ako kabukombi, mane, waa kasanduka kuba sibwaamu. Kwa kamutola mu tugwagwa. Buzuba bumwi, waa kali kuyanda kuyo teka bbakete lya maanzi, kutandila ileveni okuloko mu buzuba, elyo mpaawo kwa kakkede Muntu; mu Juda atala awa, aa buboneki obu buniini. Elyo waa kati...

⁷⁸ Cindi na kaunka kuyo tula bbakete lyakwe kunselelo lya cakugujila, kuti atekte maanzi, waa kamvwa Muntu kaamba kuti, “Mwanakazi, ko Ndi letela akunywa.” Elyo waa kati...

⁷⁹ Waa kanyona cakufwambaana, a ku Mu yeeya kuba buyo mu Juda walyonse, nkambo Wa kali muntunsi buyo kuciimo mbuli mibili mbo wakali kuba. Wa kali Muntu; kalya, kanywa, kaona, mbuli mbo tucita. Wa kali muntunsi loko kusikila Wa kakonzya kufwa, elyo nekubaboobo Wa kali Leza. Mpawo tu jana kuti, cindi...

⁸⁰ Kati “Tacili cilengwa kuli ndinywe noba Juda kulomba Basamariya zintu zili boobo.”

⁸¹ Wa kati, “Pele ikuti nooli muzi Oyo ngo wambawida, nowa Ndi lomba aakunywa.” Kaamba, “Koya ukalete mwalumi wako muboole okuno.”

Waa kati, “Ta ndi jisi mulumi.”

⁸² Kati, “Yebo waamba bwini. Uli jisi bosanwe, alimwi oyo ngo pona awe tali wako.” Ncinzi cakacitika? Leza waka bambide cintucimwi cakwe.

⁸³ Waa kati, “Munene, Nda kuziba kuti Uli Musinsimi. Tu lizi kuti cindi Mesiya akuboola, Uyo twaambila zintu ezi. Nce ncico Nca yoocita. I Ijwi lyaamba boobo. Tula cilangila. Nda cimwa a kukatala ku zintu ezi zyoonse, tuyanza twa buzumini bwabo a zintu, Bafarisi, Basaduki, abana Heroda, kufumbwa mbo cikonzya kuba. Pele tu lizi kuti Mesiya ulaboola, cindi Aku boola. Ino Mwaamba nzi kujatikizya ncico?”

⁸⁴ Wa kati, “Nde Ndime.” Amen! Leza waka bambide nzila. Waa kasiya nongo ya maanzi, mwanakazi wakacinka, a kuzuzila mu munzi, a kuti, “Amuboole, mubone Muntu Oyo wandaambila zintu nze Nda kacita. Sa oyu tali Mesiya?”

⁸⁵ Petro, kaswiilila ku kaano ka Andreya, a ziindi zinji wakali kuswiilila, kamvwa Andreya kakanana kujatikizya Johane kazibya Mesiya, a Muntu, a zintu ezi zyoonse kazicitika. Akali maseseke oonse kuli Petro. Pele buzuba bumwi wa kaboola a Andreya, kuzo bona Jesu. Elyo cindi na kanjila mu Busyu bwa Jesu, Jesu waka mulanga, elyo Wa kati, “Zina lyako ngu Simooni, alimwi uli mwana wa Jonasi.” Leza waka bambide nzila kuli Petro kubona kuti Wa Ka lini. Wa kali Mesiya oyo.

⁸⁶ Lino tu jana kuti, oyo Jesu nakamana kufwa, a kutanta kuya ku Julu, Mbungano yakali kuyandikana Nguzu, ku bumboni. Leza waka bapa Pentekoste. Wa kapa Pentekoste.

⁸⁷ Myaka ili zyuulu zyobilo yakainda, beenzuma. Myaka ili zyuulu zyobilo yakainda. Mu mazuba akumamanino, tuli jisi obo, muntu waka njila mu ciyanza ca Bunakristo alimwi Ku busandula sandula alimwi, ka Bu tintanya ku tuyanza twa bukombi, mambungano, tubungwe, mibandi ya bupampu, kusikila Nguzu a cintu cini ca Makanimabotu aa Kristo zya kasweeka mu kasimpe. Elyo mpaawa tuli a Ijwi lyaka syomezegwa ku mazuba aya akumamanino, eco ciyo citika, eco ciyo citika; muntu ta Li syomi. Ba kazwa kuli Ndilyo. Wa babuzya ikuti na Mbanakristo; kwaamba, “Ndi zulilwa *kooku-a-boobu*.” Eco ta caambi cintu comwe. We elede kuba Munakristo kwinda ku kuzyalwa. Lino tu jisi cintu coonse mu Babuloni alubo, kumane myaka ili zyuulu zyobilo.

⁸⁸ I Mbungano sunu iyandikana Nguzu a Bwini, alubo. Oh! Leza wakabusya Mwana Wakwe, kuti eci inga ciyo mamelwa, nkambo Wa kati, “Ii kaindi kaniini nkabela inyika taika Ndi boni limbi; nekubaboobo muyo Ndi bona, nkambo Njo oba andinywe, akwalo muli ndinywe.” Tu jana kuti, mu ba Hebrayo 13:8, “Ngu mbobuca nguwenya, sunu, amuya myaaka.”

⁸⁹ Tu jana kuti, muli Malaki 4, kuti Wa katusyomezya Mulumbe mu mazuba aakumamanino, kuti uyo “boozya Lusyomo lwa bantu kujoka ku matata alimwi.” Wa ka usyomezya, mu mazuba aakumamanino.

⁹⁰ Wa kasyomezya akwalo, muli Johane 14:12, “Oyo usyoma ali Ndime, milimo eyo Nje cita uyo icita awalo. Noiba minji kwinda

eyi, na cipati maningi kwinda ceeci, uyo cita, nkambo Nda unka kuli Taata Wangu.”

⁹¹ Wa kali kukanana buzuba bumwi. Ba kati, “Simalela, kotu tondezya citondezyo.”

⁹² Wa kati, “Ii nzyalani iikompeme aya bumambi iyandaula citondezyo.” Eyo nje nzyalani njo tuponamo sunu. Wa kati, “Elyo Ndiyo bapa citondezyo. Nkambo mbuli Jonasi mbwakali mwida lya nswi, mazuba a masiku otatwe, mbubonya Mwana wa muntu mbwaelede kuba mu moyo wa inyika, mazuba a masiku otatwe.”

⁹³ Ino musyobo nzi wa citondezyo nzyalani ya bubambi njoi kujana? I citondezyo ca bubuke. Elyo nce ncico ncotwa kasyomezegwa asunu, citondezyo ca bubuke cakuti Uci pona, Ngu mbobuca nguwenya, sunu, amuya myaaka.

⁹⁴ Wa kati, “Mbuli mbo kwakabede mu mazuba aakwa Lota,” mbuli mbo twa kainda muli ngawo masiku ainda. “I mazuba akwa Lota, eco cakacitika mu mazuba akwa Lota, mbubonya mbo ciya kuba ku kuboola kwa Mwana wa muntu.” Ezi zintu zyaka syomezegwa, Magwalo amwi ambi. Ku kasya kumanizya ciindi . . . “Ii kaindi kaniini nkabela inyika taika Ndi boni limbi. Kosmosi, ‘bubambe, bwa bukkalo ibwa mbungano,’ tabaka Ndi boni limbi. Nekubaboobo moyo Ndi bona, nkambo Njo oba andinywe, nomuba muli ndinywe, kusika kumamanino aa bukkalo.” “Jesu Kristo mbobuca nguwenya, sunu, amuya myaaka.” Ino ncinzi? Calo ncitondezyo cakabambwa a Leza, nzila yakabambwa a Leza.

⁹⁵ Abrahamu kalindila mwana. I citondezyo camamanino eco nca kabona kakutanaba lunyonyooko lwa Bamasi, wakali Leza waka tondezegwa mu mubili wabuntu, wa kaziba maseseke a moyo wa Sarah cindi nakali mu tente. Jesu wakati, “Eco ciyo jokela ku kuboola kwa Mwana wa muntu.” Mukwesu, mucizi, Ndi syoma kuti tu pona mu buzuba obo. Nda syoma kuti obu mbuzuba bwa cisyomezyo.

⁹⁶ We elede kuba a lusyomo muli ceeco nco cita. Ikuti na tojisi lusyomo, ikuti na ucibweza buyo cakuyeeyela . . . I bbala *kuyeeyela* buyo, kweendelana kuli Webster, lyaamba kuti, “kucita cimwi kakutakwe kuzumizigwa.” Pele cindi Ijwi lya cisyomezya, alimwi Leza waima kunze lya Ijwi eelyo, toli mu kuyeeyela limbi. Uli mukucita nciconya eco Leza nca kaamba obo, alimwi Uli sinikizidwe ku Li iminina.

⁹⁷ Mupati, wampuwo, i—i silubukulusyo, myaka minji yakainda, Nda kamubona cindi Ne kali mulombe muniini, wakali Paul Rader. Wa kaamba kaano, buzuba bumwi, ako lyoonse kakajatilila kuli ndime. Wa kati, “Buzuba bumwi, twa kali kugela cisamu.” Wa kali musambazi wamatanda, kutala mu Oregon, a kwaamba kuti simalela waka mwaambila kutanta atala lya cilundu. Wa kali kulota. Awo nakabede ncobeni, ku ciindi, wa kali kunselelo mu tusuwa; nkabela waka ciswa

ntuntumaanzi, kupya loko, elyo wakali kufwa. Ba kaunkila dokotela, pele akali mamaile a mamaile kule, kubelesya kkanu.

⁹⁸ Dokotela katana konzya kusika okuya, Paulo wakatalika kuyabaala, wakaindila kuciswa a kuciswa kapati. Wa kaita mukaintu wakwe uusyomeka. Wa kati, “Oyandwa, kuya busiya mu kaanda, kusija maningi, kujala mukati.” Elyo waka jokela mu kulemuka.

⁹⁹ Eyo cindi na kacita, wa kati wa kalota, cindi na kali mukulebuka oku, kuti simalela wakwe waka mutuma kuyo gonka cisamu cimwi. Wa kajana cisamu, wa kausya cisamu, kayasa keembe kakwe muli ncico, akutambikizya ku kabweza. Ta kakonzya ku kabweza. Kati nsana zyakwe zyakali manide. Ta kakaonzya ku kabweza. Wa kati, “Musela oonse wa cisamu eco, masimpe Nda konzya kuubweza oyo. Andi sole alubo.” Elyo wa kayaansi nkabela wa nyamuna, wa kapengaana mane wa kakatala. Wa kakkala ansi kumbali lya cisamu, a kwaamba, “Ta ndizi buyo eco nce Ndi yoocita. I simalela uyanda cisamu eci kuselelo okuya ku cilabba, alimwi Ndili kompeme loko kucileta aansi.”

¹⁰⁰ Kati wa kamvwa Jwi bbotu loko ndya kasola kumvwa, wakali simalela wakwe oyo waka kanana; pele kati, cindi na kanyona kubona oyo simalela wakwe mbwa kabede, wa kali Mwami Jesu. Wa kati, “Paul, ncini nco lwana maningi? Ncini nco nyongene konse? Wa bona maanzi ayo enda alya?” Kati, “Nkaambonzi to ciwaali buyo citanda mu mulonga, akutanta ali ncico? Kotanta ali ncico kuya ku cilabba.”

¹⁰¹ Wa kasotokela aa citanda akutalika kuselemukila atala lya mayuwe, kakwiila agolela jwi lyakwe. “Ndili citantide! Ndili citantide!”

¹⁰² Mukwesu, mucizi, Jesu Kristo wakasyomezya zintu ezi kucitika mu mazuba aakumamanino. Ndi syoma kuti tuponena ano. Ndi syoma kuti Ngu mbobuca nguwenya, sunu, amuya myaaka. Ta ndizi mbo cakacitika, pele Ndi tantide ali Ncico. Ndi syoma kuti Bwalo Mbwini, nkaambo Alo ni nzila ya Makanimabotu, akabambwa a Leza. Ndi syoma kuti Walo Mulumbe wa oora, ciindi ncotu ponenamo. Ni inzila yakabambwa a Leza. Ndili Uta ntide!

Sa inga tosotoka kuba andime, kuciindi notu kotamika mitwe yesu?

¹⁰³ Taata Wakujulu, twe endela mu Bulemu aa Ijwi Lyako. Tu syoma kuti Ijwi Lyako Mbwini. O Leza, akube kuti mwaalumi a mwanakazi oonse, sunumasiku, kutanta a Ijwi, a kuyeeya, mbuli mbo baselemuka mu lweendo, bala konzya kulyaambilila kuti, “Ndi tantide a cisyomezyo ca Leza. Ciyo nditolu moonya mu Bulemu. Ni nzila yakabambwa a Leza yangu sunu. ‘Jesu Kristo mbobuca nguwenya, sunu, amuya myaaka.’”

¹⁰⁴ Yebo wakati, “Ii kaindi kaniini elyo inyika taika Ndi boni limbi, nekubaboo muvo Ndi bona; nkambo Njo oba andinywe, akwalo muli ndinywe.” Wa ka tusyomezya, Mwami, kuti tuyu Ku bona.

¹⁰⁵ Iba Griki bakasika, ciindi cimwi, a kuti, “Nobaalumi, tu yanda kubona Jesu.” Elyo baka pegwa coolwe eco. Elyo sunumasiku, Mwami, tu yanda ku Kubona, aswebo. Nkuyandisyu kwa myoyo yesu. Taakwe muntu ukonzya kusola kumvwa Nduwe, citakuti bayanda ku Kubona. Mpawo ikuti na aba Bagriki baka zumizigwa ku Kubona, alimwi Wa katubambilila nzila yesu yaku Kubona, Lyoonse ula bamba nzila nkaambo Uli mbobuca nguwenya, sunu, amuya myaaka. Ii mulanda wakaleta aba Bagriki mu Busyu Bwako, nkabela beeleder ku Kubona. Ko tupa coolwe nciconya sunumasiku, Taata. Akube kuti swebo, mbuli balanda, kuleta bbunga eli mu Busyu Bwako. Elyo akube kuti tu bone Jesu, sunumasiku, Oyo ngu mbobuca nguwenya, sunu, amuya myaaka. Ko cipa, Mwami.

¹⁰⁶ Vuna basweekede, Mwami, ikuti na kuli mwaalumi, mwanakazi, mulombe, na musimbi. Cindi twa bona cis i cesu kacisofweede loko a bajayi a basikutenda tumeneno, a kupilingana, a kubona kubija mu cisi asunu! Elyo kubona bubi mu mambungano, a kuba bona kabasololela ku cijailo eco ca bupaizi kutala okuya, nkaambo tabainki mu nzila yakabambwa a Leza! Beendela mu nzila ya kayanza kabuzumini kamwi mubusena bwa kuboola kwiinda ku Ijwi.

¹⁰⁷ Leza, twa lomba kuti Banakristo, beni ncobeni bakazyalwa, mbuli mbo Nda kacipandulula, kwiinda mukuba madakisi eni, ba . . . “Mbelele zyangu zilamvwa Jwi Lyangu, mweenzu tazika mutobel.” Mwami, Jwi Lyako ndi Ijwi. Eyo lyoonse yakali nzila Yako yakabambilwa Mbungano a ya bantu, ndi Ijwi Lyako. “Ijwi Lyako Mbwini.” Alimwi Uli Ijwi. Elyo Bbaibbele lila twaambila, “I Ijwi lya Leza lila bosya kwiinda panga lya mabemba obilo, sikutwela wa miyeeyo a makanze aa moyo.”

¹⁰⁸ Nkaambonzi Israyeli ncoba takakonzya kubona Mesiya wabo, cindi niba kabona kuti Wa kali Ijwi eelyo, cindi Na kakonzya kutweluka miyeeyo yakali mu moyo wabo? Nkaambonzi tiiba kacita? Ba kacimvwisya kwiinda ku basinsimi, kuti basinsimi bakakonzya; pele cindi buzule bwa Leza nibwaka bambwa mu Mwana Wakwe, alimwi Wa kapona akati kesu, mpawo baka kakilwa ku cibona nkaambo bakali ofweede.

¹⁰⁹ Mwami, abo bajisi meso abo kaajukide, sunumasiku, akube kuti tu bone Jesu akati kesu. Akube kuti muntu aumwi uuciswa aponesegwe. Akube kuti eci cicibambe, Mwami, kuti tabakaciti, limbi, kuzwa ku ora eli a . . . pele nco baya kusyoma kuti Nduwe Mesiya. Bali mukuboola mu nzila ya Leza. Bunji bwabo nkobali,

sunumasiku, kabafwa. Kuli banji awa, sunumasiku, abo antela bata kabi okuno mvwiki kuzwa sunu, ikuti na Yebo, lugwasyo Lwako talu booli.

¹¹⁰ Lino, Taata, Yebo ujisi buyo mulimo kuli ceeco Nco kasyomezya. Pele Wa kasyomezya kuti tuyo Ku bona. Wa kasyomezya kuti eco Nco kacita tuyo cicita aswebo. Eli nde oora. Nda caamba; Nda cisyoma. Ndi Ku mvwa koamba booboo; Ijwi Lyako lyaamba booboo. Ko cisimpikizya. Ndi lizi kuti nca kasimpe. Lino acizibwe, Mwami. Kuli lembedwe, eno acicitwe, nkambo ka Bwami bwa Leza. Ameni.

¹¹¹ Nse syomi kuti tula ita mundando wa mipailo. Nda syoma Ndila ubeleysa buyo kuzwida mpoonya awa.

¹¹² Mbangaye banu bacisidwe? Lino mwalombwa kuba... Yebo utambikide janza lyako, kupa bumboni kuti ulicisidwe.

¹¹³ Mbangaye banu bayo peda bumboni ku cintu nciconya, "Mukwesu Branham, Nse futukide ncobeni"? Sa inga watambika janza lyako, "Kondi kombela"? Leza aku longezye, yebo. Eco ncibotu. Eco... Leza aku longezye. "Nse futukide pe."

¹¹⁴ Lino, nywebo nomwa tambika maanza anu, a ndinywe nomwa tacita, "Pele, Mukwesu Branham, nincobeni Ndi yanda kufutulwa. Walo moyo wangu. Ndi syoma kuti kunyina cintu cisyeede ku muntu uli oonse mu inyika." Nkunji buti, ncinzi nco konzya kuzwidilila, cinga caba cipati maningi kwiinda lufutuko lwako? "Kondi kombela. Ndi yanda kufutulwa." Sa inga watambika janza lyako, konse ku buyake, kufumbwa oko, "Ndi yanda...?"

¹¹⁵ Mbangaye banu batana tambula Muuya Uusalala, kwaamba kuti, "Ndi lizi kuti Nde elede ku Utambula"? Amu tambike maanza anu. "Nse na cita; Ndi yanda kucita." Yaa, kuli basyoonto bata cita.

¹¹⁶ Lino, Kristo ula libamba Ijwi Lyakwe, alimwi weelede kubamba lusyomo lwako muli Nguwe. Walo ndi Ijwi. Lino, ba Hebrayo capita 4, kaamba kuti, "i Ijwi lya Leza," uli ngu Kristo. Kristo ndi Ijwi. Nywebo nyoonse mulizi obo na? Amwaambe, "Ameni." [Mbunga yaamba, "Ameni."—Mul.] Walo ndi Ijwi, "mbobuca nguwenya, sunu, amuya myaaka." Obo Mbwa kabede muli Musa, akwalo Mbwa bede muli Eliya; obo Mbwa kabede muli Eliya, Wa kali muli Johane; obo Mbwa kabede muli Johane, Wa kali zulizya Mwini muli—muli Jesu. Elyo asunu Ngu mbobuca mbuli Mbwa kabede kaindi, alimwi Li cili Ijwi lya Leza lyaka sinsima ku buzuba, eco ci Mu bamba kuba Mumuni oyo uuyaka a kusimpikizya Ijwi lya cisyomezyo.

¹¹⁷ Tuli ku ciindi camamanino, beenzuma. Jesu mpali. Ndi lizi kuti mwa kamvwa eco.

¹¹⁸ Ino tona kubona, mu buumi bwako, alimwi toka kuba gano lya kukubona, kwiina muntusi wakacita, pele lyonse mu ziindi

zisyonto wakaba akulimvwa kwini ku kasaala? Elyo Nda kajisi kukubona, Ne kakonzya kubona, alimwi Ne ka kwaambila kuti lyakali zuba. Yebo wati, “Ta ndizi mbo cicitika, pele Ndi jana kulimvwa, mbuli kukasaala, inga wa limvwa.”

Nda amba, “Eelyo ndi zuba.”

“Ino zuba ninzi?”

“Walo mumuni.”

“Ino mumuni niinzi?” Inga yaba inyika mpya kuli nduwe kumaninina.

¹¹⁹ Pele ino kuti Nda kwaambila kuti Jesu Kristo waliimvwa mpoonya awa lino? Ino kuti Nda kwaambila kuti Mpali akati kesu? Wa ka cisoyomezya. “Oko bobilo na botatwe nkoba bungene mu Zina Lyangu, awo Mpeli akati kabo. Mpaawo Mpe bede!” Lino obo antela Mbwini, kuli ndime, *Obu Mbwini* bonse, na Tabuli Bwini bumwi. *Obu* antela buli Luleme, nape tabu luleme.

¹²⁰ Lino, kuciimo ca kukuvuna, Wa kacita ceeco cindi Na kafwa aa Kalivari. Kuponya nduwe, Wa kakucita oko cindi Na kafwa aa Kalivari. Mula syoma obo. I Ijwi lyamkaamba kuti Wa kacita.

¹²¹ Lino cintu biyo eco Ncali nokonzya kucita, ikuti na Wa liimvwi awa kasamide a—a nsuuti eyi, eyo Nja kandipa, inga watondezya buyo kuli ndinywe kuti Wa kali Mesiya.

¹²² Kutali ku nembe zya mpikili mu janza Lyakwe. Uli onse sikuupaupa inga wacicita eco, kubikka nembe zya mpikili, a bulowa konse kumeso akwe, a mpa azintu. Eco inga cacitwa. Mbo cakabede. Bantu banji abalo baka bambulwa mbuli Nguwe. Eco tacili ncico.

¹²³ Pele Buumi Bwakwe, obo bwakali muli Nguwe! “I Mwana takonzyi kucita cintu, muli Lwakwe, pele eco Nca bona Taata kacita.” Bwalo Mbuumi buli muli Nguwe, bwaka tondezya. Kutali kaambo kakuti Wa kali mu Juda mbuli mbwa kacitila mwanakazi muniini ku mukalo ku Mu syoma kuba Mesiya; nkaambo Wa kali kukonzya kutweluka miyeeyo mu moyo wakwe, eco caka Mu bamba kuba Mesiya. Ikuti na eyo yakali nzila Mesiya mbwa kalizibya Mwini mu mazuba akainga, eyo yakali nzila Yakwe yakabambwa ya kulizibya Mwini. Eyo yakali nzila Yakwe yakabambwa, kweendelana ku Lugwalo, ya bukkalo obu. Sena mula syoma obo?

¹²⁴ Lino, umwi aumwi wantu okuno, Ndili mweenzu. Nda langa koonse, Nse bwene muntu umwi Ngwe zyi. Bantubonse omuno, abo bata ndizi, alimwi bazi kuti taakwe Nce zyi kujatikizya ndinywe, amutambike maanza anu. Canguzu, koonse. Oyu muntu uuledie awa aa kalo aka, watambika janza lyakwe. Ta kandizi pe. Taakwe muntu undizi.

¹²⁵ Pele yeeya, Leza uli kuzyi. Leza uli kuzyi. Lino, ikuti na Wa tondezya kuti Mpali ano.

“Ino ncinzi, Mukwesu Branham?” Calo ncipego.

¹²⁶ Ino cipego ninzi? Ino ncipego niinzi, nekuba? Kutali kubweza cintucimwi a kubellesya cintucimwi, kwaamba, “Ndi jisi cipego ca kuponya! Nda unka kumasena a kuponya *oyu* umwi, kuponya *oyo* omwe.” Ikuti na Nda konzya, inga Nda cicita ncobeni. Lino, pele, cipego, alimwi uli—uli . . . Ula cipanduulula bumbi cipego. Ii cipego nkuli “gusya buyo lwako mu nzila a kulekela Muuya Uusalala kukubelesya.” Mwabona? Eco nce cipego.

¹²⁷ Obo mbombubo mukutausi mbwa bede. Ta kambauki eco nca yanda kukambauka. Ula ligusya buyo mwini mu nzila, calo ncipego, a bunanike bwasika, alimwi ula—ula kanana kwiinda mu bunanike bwa Muuya Uusalala. Kufumbwa cipego cimbi ni nzila njiyonya. Lino, zipego zya bakutausi, a zimwi zimbi, zyakaliko. Kuli, lutaanzi, zya zipego zyakapegwa aa Leza, ngu, “bataanzi mbaapostolo, basinsimi, bamayi, beembeli, a bavangeli.” Eyo nje milimo. Ezyo nzipego zyesu.

¹²⁸ Lino, Jesu Kristo wakasyomezya kuti inga Uyo cita ceeci mu mazuba aakumamanino. Ikuti na Wa cicita, ikuti na Wa syomezya ceeco a kucicita, mbangaye bayo syoma aku Mu zuminha, sunumasiku? Tambika janza lyako, kwaamba, “Nda Mu zuminha.” Mbangaye omuno mpawo . . . Nda lumba. Mbangaye omuno batana kuba muli umwi wa miswaangano, amunyamune maanza anu. Ma, kutandila cisela ca bbunga. Mbangaye basyoma, Walo katana cicita, mula syoma nekuba? Leza amu longezye.

¹²⁹ Lino amulange. Ikuti na Nda mwaambila Bwini, Leza uli sinikizidwe ku ndiingula. Uyo cita. Ula bikka Majwi Aakwe mu mulomo wako nkabela baba zintu. mbo mbubo, Alo Majwi Aakwe, Eelede kucicita. “Nda katuma Ijwi Lyangu, Tali kajoki cakubula.”

¹³⁰ Lino, ikuti na Nda konzya kuponya, Ne kucicita. Mbuli buyo muntu ulemekwa, sikwaazwa, Mukwesu Upshaw oyo ngo twali kwaambaula. Oyo mudaala ukkede kusule okuya mu wiluceya eyo, mudaala sicamba, Ne muponya ikuti Neli kukonzya. Nda katalika kusiya cibumbili, mukusinizya, elyo Nda kanyona a kumubona mu cilengaano, kayabuya, keenda. Ka mwiita, kamwaambila mbo cakabede, nkabela eco cakali ncico. Wa kabuka a kweenda, kaboola ku cibumbili, kaguma tunwe twakwe, nakamana kuba mulema kwa myaka ili makumi ali cisambomwe acisambomwe. Mwabona?

¹³¹ I busiku mbubonya, mulindu uusiya, a muvwanda wakwe, kunselelo okuya ku lubazu. Nda kati, “Nda bona ii—ii dokotela usamide magilazi, elyo—elyo wa kapandula musimbi, muniini uusiya, aimwi kwa kamulebula kuzwa ku kameneno kakwe.”

¹³² Ii mwanakazi uusiya mucembele, inga to konzya ku mujatilila kuzwa aa cibumbili. Waa kati, “Mwami, luse, oyo

muvwanda wangu!” Elyo ngooyu waa boola, nkamu ya maasha tii yaka konzya akwalo kumusinkila.

¹³³ Nda kati, “I Aunti, ta cikogwasyi kuboola kokuno. Oyo tali... Oyo ngu Leza.” Nda kati, “Ta cikogwasya kuboola okuno. Kosyoma buyo.” Elyo waa kfugama aa mazwi akwe akutalika kupaila. Nda kalanga koonse ku bbunga nkabela Nda kabona kazila kamanikide, mbuli, kayabuya. Nda kabona musimbi uusiya muniini kajisi cidooli mu maboko akwe, kaya buselemuka kwiinda mu kazila kamanikide. Elyo Nda mulanga musimbi muniini uusiya, ka cebuka, elyo wakali nguwenya. Nda kati, “Kwa ingulwa.” Waa kaimikila akuzwa mukalo. Mwabona?

¹³⁴ Ngu Leza. Mwabona? Ngu Leza. Mwabona? Ta konzyi... Taakwe ukonzya kuponya. Lwalo ndusyomo lwako muli Leza.

¹³⁵ Lino, Bbaibbele lya kaamba, kuti, “Walo Mupaizi Mupati, ndyoonya lino, oyo ukonzya kugumwa kwiinda kukulimvwa kwa kulengauka kwesu.” Sena mula syoma obo? Ii Mupaizi Mupati! Lino, ikuti na Walo Mupaizi Mupati, mbobuti Mbwa nga wacita? Ikuti na Ngu mbobuca nguwenya, sunu, amuya myaaka, inga Uyo lilemeka mbobuca nguwenya, sunu, amuya myaaka.

¹³⁶ Lino amukcombe, a kulekela Muuya Uusalala mpawo... Amwaambe kuli Leza kuti, “Leza, oyu muntu wiimvwi awo ta ndizi pe, pele eco Nca amba cibamba kuyeyya kubotu. Uli mbubonya. Nduwe Kristo. Ndili cisidwe. Ndili bulide. Elyo ikuti na Wa ndilekela naa... Ikuti na Nse jisi lusyomo lwa kucicita, lekela muntuumwi oyo Ngwe zyi kuba a lusyomo, a ku cilekela... Koi ita a ku—ku—ku ndilekela na muntu oyo kuguma mombe wa Cikobela Cako mu Bulemu. Mpawo ikuti na oyo muntu tawo mu nzila, nkokuti Ko belesya mulomo wakwe ku kuvviila, a kucicita buyo nzila njionya Njo kacita cindi Ni wakali aa nyika. Njo ziba kuti Nduwe mbobuca nguwenya, sunu, amuya myaaka.”

Atu kotamike mitwe yesu eno.

¹³⁷ Mwami Jesu, kuzwa ku buvangeli kuya ku mulimo wa businsimi, pele nekubaboobo Nda Ku syoma, Mwami, Wa ka cisyomezya. Elyo Nda komba kuti Uyo cipa, sunumasiku. Ko cipa. Kondi swiilila. Cindi eli bbunga lyazwa awa, sunumasiku, elyo twa unka ku muunzi, akube kuti twaambe mbuli abo bakazwa ku Emau, “Sena myoyo yesu tii yapya muli ndiswe mbuli Mbwa ali kwaambaula kuli ndiswe mu nzila?” Jesu wakabuka kuzwa ku bafu; tiiba kacizyi. Ba kali kwaambaula kuli Nguwe; teeба ka cizyi. Pele cindi Na kaba sisya mu ng’anda, a kujala mulyango, mpawo Wa kacita cintucimwi nzila Mbwa kacicita kakutanaba kubambulwa Kwakwe. Eco cakajula meso abo. Ba kabona kuti wakali Nguwe. Alubo, Mwami, akube kuti myoyo yesu ipye mbuli mbo tuyu ku muunzi sunumasiku, mbuli yabo mbuya kacita. Nkambo tu lizi kuti Wa kanana kuli ndiswe mu nzila. Kocita zintu, sunumasiku, ezyo Nzo kacita cindi Ni

wakali aa nyika, nkambo Nduwe mbobuca nguwenya, sunu, amuya myaaka. Twa lomba mu Zina lya Jesu. Ameni.

¹³⁸ Lino amube mu mipailo a kusyoma buyo. Atu salazye lubazu *olu*, lutaanzi. Takukwe makani awo mpo bede, mu buyake, amu syome Leza. Ndi lombozyakuti muntu onse abatame nconzyo akukkala cabuumuzi, kupaila.

¹³⁹ Eci tacikonzeki kumaninina. Ndali kwaambaula cifumo cino, ku kalimbabula ka bakutausi aa, “cikankamanisyo.” Ii *cikankamanisyo* tacikwe busyome, “cintucimwi citakwe busyome, pele nekubaboo nca bwini.” Yebo ulizi kuti Muuya Uusalala inga waima awa a kwaamba cintucimwi mu bbunga elyo, ku bantu abo Mbe ntazi, inga caba cikankamanisyo. Calo ncintucimwi citakwe bupandulule. Ta ndizi kuti Uyo cita. Ndi langila buyo kuti Uyo cita, kusyoma kuti Uyo cita.

¹⁴⁰ Lino komba buyo, a kwaamba, “Mwami Jesu, Ndi yanda kuguma cikobela Cako, alimwi Ndi—Ndi jisi kubula. Nda Ku syomezya, Mwami, Ndiyo—Ndiyo Ku belekela buumi bwangu boonse.” Leza uyanda kuti weempwe. Ikuti na tona kweempwa; koempwa, kwaamba, “Ndi yanda kweempwa, Mwami. Ndi yanda kuti Undi ponye. Ndi yanda kuti Undi longezye. Kondi ponya lino Mwami. Ndili mulanda Wako.”

¹⁴¹ Ndali kuunka . . . Sena wavozya makkaadi aa mipailo sunu? Ndali kuno buzya Billy naa . . . Ikuti na ta cicit, Ne ita mundando wa mipailo. Pele teeба vozya makkaadi aa mipailo sunu. Amu kkale buyo caku batama, amusyome.

¹⁴² Lino, mu Zina lya Jesu Kristo, Nda bweza myuuya yoonse awa kuba kensi lya bweedelezi bwangu, nkambo ka bulemu bwa Leza, kuti Ijwi Lyakwe liyo yubununwa, kuteeti ku Buzuba bwa Lubeta ta tukabi a ntamizyo.

¹⁴³ Lino langa nzila eyi, a kusyoma eno. Komba a moyo wako oonse, alimwi kokomba buyo, a cabubombe. Uta Ci Iwani. Koli pumuzya buyo omwini, a kwaamba, “Mwami, Wa ka panga cisyomezyo. Nda Ku syoma.” Nce ncico Nce elede kucita.

¹⁴⁴ Ndi lizi kuti taku *yandikani* kuli ndime ku kulomba. Mbangaye bakasola kubona oyo Mumuni? Atu bone. Mwa kacibona cifwanikiso ca Nguwo. Atu bone maanza anu, abo bakasola kubona cifwanikiso ca Nguwo. Sena mwa Ubona mpoonya awo? Mwabona, ncilao cimbi. Ula atala eni a mulindu oyo.

¹⁴⁵ Walo uciswa penzi ku maulu akwe a kusule. Waa . . . Sena ula syoma kuti Leza inga wakuponya, mucizi? Ino waguma nzi? To ndizi, pele wa guma Cintucimwi. Ikuti na Mwami Jesu wa ndaambila kuti nduweni, sa eco ciyo kubamba kusyoma kabotu? Nduwe Muka. Phillips. Ikuti na mbo mbubo, koimikila ku matende ako. Yaa. Sa Ndili mweenzu nconzyo kuli nduwe? Tambika janza lyako ikuti na eco cililuleme. Nsenya mubona mu buumi bwangu. Ino waaguma nzi? Koya kaambaula ku

mwanakazi, kwamana. Koonse kucisa kwamana lino. Uli kabotu. Inga waunka ku muunzi a kuba kabotu.

¹⁴⁶ Ngooyo mulindu, nkoonya kusule lyakwe. walo uciswa kunyongana kuyeeya. O Leza, ikuti na ta... Zina lyakwe ngu Muka. Star. Kosyoma, Jesu Kristo uyo kubamba kuba kabotu. Koimikila ku matende ako a kutambula kuponesegwa kwako. Ikuti na Ndili mweenzu kuli nduwe, kovukauzye maanza ako. Kunyongana kwako kwamana. Jesu Kristo waku ponya.

¹⁴⁷ Ino ncini Nca kasyomezya? Wa kacisyomezya. Sena mula syoma?

¹⁴⁸ Ngooyo mulindu uli nkoonya kusule lyakwe, ukkede alya. Ula paila. Ula libilika, ujisi buyumuyumu bwakusilikwa. Uyanda kuleka kufweba. Zina lyakwe ngu Muka. Bordon. Buka, Muka. Bordon. Musanga yako ya tombwe yamana. Jesu Kristo waku ponya. Nsena babona banakazi mu buumi bwangui.

¹⁴⁹ Sena mula syoma? Lino mulizi kuti Nse konzyi kucita ceeco. Oyo ngu Jesu Kristo. Ino ncini? "I Ijwi lila buumi, nguzu zinji, kwiinda cceba lya mabemba obilo, sikutwela wa miyeeyo a makanze aa moyo." Ndi Ijwi, Jesu Kristo mbobuca nguwenya, sunu, amuya myaaka. Sa tamu konzyi kusyoma obo?

¹⁵⁰ Mpaawa, mpaawa kukkede mwaalumi awa, ujisi heniya, penzi lya moyo. Mbo mbubo. Ta ndizi mwaalumi. Nsena mubwene. Pele walo mukutausi. Mufundisi, Ba. Kinsey. Mbo mbubo. Sena ula syoma, munene? Koima ku matende ako a kutambula kuponesegwa kwako. Jesu Kristo wakubamba kuba kabotu.

¹⁵¹ Akwalo, sa inga wandi citila luzyalo, mukuba mukutausi? Bikka maanza ako aa mukaintu wako, uciswa penzi lya nsa, a penzi lya muni, akwiindila kulema, a buyumuyumu bwakusilikwa. Bikka maanza ako ali nguwe. Ciyo musiya, ikuti na ula syoma.

¹⁵² Kwaamba, ngooyo mwaalumi uukkede nkoonya kusule lyako, ujisi cimvule ca lufu. Ujisi kkulenge. I mwaalumi uciswa cikoto, kkulenge, kulibilika. Zina lyakwe ngu Ba. Young. Kosyoma eno. Jesu Kristo wakubamba kuba kabotu. Sena ula cisyoma? Sa ula cizumina? Yaa, munene.

¹⁵³ Mpaawa kulazikidwe mwaalumi, kalede awa mu kalo aka. Munene, Nse kuzi pe. Ikuti na Nda konzya kukuponya, Ne kucita. Ndi mweenzu kuli nduwe. Wa boola nzila yonse eyi. Wa bamba canguzu kuboola kokuno. To konzyi kusisa eco cilubide kuli nduwe; pele Nse konzyi ku kuponya. Wa boola okuno antoomwe amukaintu wako. Ngo nguwe ukkede alya uusamide bbaki lya mubala wa piichi. Mbo mbubo. Yaa. I mwaalumi uvumbidwe cimvule ca lufu; ta konzyi kupona cit kaindi kaniini lino. Ujisi kkulenge.

¹⁵⁴ Ula ciswa, ayebo, mucizi. Sa ulasyoma kuti Leza inga wandaambila eco nco ciswa? Ndi penzi lyako lya musana. Mbo mbubo. Ikuti na kuli luleme, konyamuka. Ncibotu, kotambula kuponesegwa kwako. Ko cisyoma. Bikka janza lyako aa mulumi wako.

¹⁵⁵ Sena ula ndisyoma kuba musinsimi Wakwe, munene? Ikuti na kolede awo, uli masimpe kufwa. To konzyi kupona. Kwa mana. I bamadokotela bakakulanzya meso. Kkulenge lya kakulya do. Nda bona zilwazi zipati kwiinda cako zya kaponesegwa. Ta ndikonzyi ku kuponya. Pele ikuti na uyo cizumina a kucisyoma buyo! Sena ula cisyoma? Nce coolwe cako cilikke. Ziindi zyako zyamamanino ziya bumana. Sena ula cisyoma? Ikuti na wacita, koimikila kuzwa mu kalo ako. Konyamuna kuzwa awo, mu Zina lya Jesu Kristo! Koima ku matende ako a kuba kabotu, a kweenda kuzwa awa, kolemya Leza. Muntuumwi aamupe janza owo, ko mugwasya. Ngooyo we, aa matende akwe.

¹⁵⁶ Mbangaye muno basyoma? Amu tambike maanza anu. Amwiimikile ku matende anu. Nobamwi banu bayanda kuponesegwa, amwiimikile, mu Zina lya Jesu Kristo. Amunyamune maanza anu, akulumbaizya Leza. Amu Mu lumbaizye akupa bulemu. Lino amulumbe Mwami ku kuponesegwa kwanu, Jesu Kristo mbobuca nguwenya, sunu, amuya myaaka!

¹⁵⁷ Mukwesu, bamadokotela baka kakilwa. Eyi ni nzila yakabambwa aa Leza. Amwi isyome!

¹⁵⁸ Mbangaye bayanda kuzumina nzila yakabambwa a Leza? Amunyamune maanza anu mujulu a kulumbaizya Leza, umwi aumwi wanu, a kusyoma kuti mwa ponesegwa, mu Zina lya Jesu Kristo. Ameni.



INZILA YA LEZA YAKA BAMBILWA BUZUBA OBUNO TNG64-0206E
(God's Provided Way For This Day)

Oyu Mulumbe aa Mukwesu William Marrion Branham, wakakambaukwa lutaanzi mu Chikuwa Bwane mangolezya, Mulumi 6, 1964, ku Kern County Fairgrounds mu Bakersfield, California, U.S.A., wa kagu sigwa kuzwa ku rekordi yamagnetiki teepu a kulembwa cakutagwisyacintu mu Chikuwa. Obo busanduluzi bwamu Chitonga bwa kalembwa a kumwaisigwa aa Voice Of God Recordings.

CHITONGA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitamininidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyabolwa mu ciyanza cakujokolosya, kusandululwa mu misyobo iimbi, na kubelesegwa kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org